

# 19 profesi kesihatan akan dikawal selia

Oleh : Dk. Siti Redzaimi Pg. Haji Ahmad

**BANDAR SERI BEGAWAN,** Isnin, 25 September. - Sebanyak 19 profesi kesihatan dari pelbagai bidang akan dikawal selia dalam Perintah Profesi Kesihatan Bersekutu Negara Brunei Darussalam 2017 yang bermula pada 1 Julai lalu dengan tujuan untuk menjaga kesihatan, keselamatan dan kesejahteraan orang awam.

Ketika ditemu bual Juru X-Ray Kanan selaku Pengerusi Majlis Profesi Kesihatan Bersekutu Negara Brunei Darussalam, Dayang Hajah Hashliena Wati binti Haji Mohd. Salleh, menjelaskan pelaksanaan perintah itu akan menaik taraf profesi kesihatan bersekutu di negara ini setara dengan piawaian antarabangsa bagi memastikan keselamatan pesakit dan tahap penjagaan kesihatan yang

tinggi.

"Mereka yang terlibat mestilah mendaftar bermula 1 November ini dan akan diberikan sijil pengesahan serta lesen tahunan sebagai bukti mereka telah diberi kelayakan untuk menjalankan tugas mereka di dalam bidang yang berkaitan," tegasnya.

Beliau seterusnya mengatakan 19 profesi kesihatan dari pelbagai bidang yang akan dikawal selia dalam Perintah tersebut ialah profesi dalam bidang Audiologi; Klinikal Psikologi atau Psikolog; Makmal Klinikal Sains atau Makmal Saintifik; Dietetik; Promosi Kesihatan; Prostetik dan Teknologi Maksilosafisal; Kebajikan Perubatan; Pemakanan; Pemulihan Cara Kerja; Optometri atau Optician; Optoptik; Paramedik; Fisioterapi atau

Pemulihan Anggota; Podiatri; Prostetik dan Ortotik; Kesihatan Awam; Diagnostik Radiografi atau Terapeutik Radiografi; Pemulihan Pertuturan dan Bahasa atau Patologi Pertuturan dan Teaching of Hearing Impairment.

Pegawai Podiatri, Dr. Norafizah binti Haji Zaine turut menyentuh mengenai terdapat empat jenis pendaftaran, iaitu pendaftaran Penuh; Terhad; Bersyarat dan Semestara.

"Majlis Profesi Kesihatan Bersekutu Negara Brunei Darussalam akan menentukan jenis pendaftaran mengikut status pemohon berdasarkan kelayakan dan latihan serta pengalaman dan kelayakan yang berkaitan," katanya.

Menurutnya, perintah berkenaan juga memastikan para Profesional Kesihatan Bersekutu yang berdaftar adalah kompeten dan cekap dalam melaksanakan bidang tugas masing-masing.

"Penguatkuasaan perintah itu diselanjurkan dengan penubuhan badan berkanun, iaitu Majlis Profesi Kesihatan Bersekutu Negara Brunei Darussalam yang dipertanggungjawabkan mentadbir dan mengawal selia profesionalisme para Profesional Kesihatan Bersekutu yang berdaftar di negara ini," ujarnya lagi.

Peranan-peranan utama badan berkanun ini adalah untuk melindungi orang ramai melalui pendaftaran dan pengeluaran sijil amalan (*practicing certificate*) untuk para Profesional Kesihatan Bersekutu yang berdaftar; penetapan piawaian; perlaku serta latihan juga mengekalkan pendaftaran para Profesional Kesihatan Bersekutu.

Para profesi tersebut perlu mendaftar dengan badan berkanun bagi meneruskan atau memulakan bidang tugas yang berkenaan di Negara Brunei Darussalam

dalam tahun pertama perintah dikuatkuasakan.

Beberapa siri taklimat telah pun dilaksanakan pada awal tahun ini.

Para Profesional Kesihatan Bersekutu yang belum diperkenalkan pada perintah itu, khususnya yang bertugas di sektor bukan kerajaan atau sektor swasta di negara ini, akan diberi peluang untuk bertukar-tukar pandangan maklum balas sesama para peserta yang terlibat pada sesi taklimat yang akan diadakan pada 30 September 2017, Sabtu, jam 2.00 petang di Dewan Al-Afiah, Kementerian Kesihatan, Commonwealth Drive, Bandar Seri Begawan.

Untuk maklumat lanjut, orang ramai bolehlah menghubungi Kementerian Kesihatan melalui talian +673 2381640 sambungan 6139 atau melalui e-mel [ahp.council@moh.gov.bn](mailto:ahp.council@moh.gov.bn).

## UNISSA komited mengembangkan Islam di Kepulauan Borneo



REKTOR UNISSA, Dr. Awang Haji Norarfani bin Haji Zainal (kiri) semasa hadir pada Konferensi Antarabangsa Islam Borneo Ke-10 (KAIB X) yang diadakan di Universiti Mulawarman (UNMUL), Samarinda, Kalimantan Timur, Indonesia.

**KALIMANTAN TIMUR, INDONESIA,** Isnin, 25 September. - Konferensi Antarabangsa Islam Borneo Ke-10 (KAIB X) menjadi platform wacana ilmiah dalam usaha mengembangkan dan membangun penyelidikan Islam di Kepulauan Borneo.

KAIB Ke-10 kali ini diadakan di Universiti Mulawarman (UNMUL), Samarinda, Kalimantan Timur, Indonesia, berlangsung pada 25 hingga 26 September 2017.

Seramai lima tenaga akademik Universiti Islam Sultan Sharif Ali (UNISSA) yang diketuai oleh Rektor UNISSA, Dr. Awang Haji Norarfani bin Haji Zainal komited dalam mengongsikan hasil

Siaran Akhbar dan Foto : Universiti Islam Sultan Sharif Ali

kajian dan penyelidikan dalam persidangan tersebut yang mengetengahkan tema 'Tamadun Islam di Kepulauan Borneo : Impak Terhadap Pembangunan Ummah Wasatiyyah'.

Rektor UNISSA selaku Pembentang Ucaptama dalam kertas kerjanya bertajuk 'Pengalaman Negara Brunei Darussalam Dalam Membangun Islam Wasatiyyah' mengongsikan bagaimana Negara Brunei Darussalam di bawah kepimpinan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam berusaha memartabatkan Islam sebagai cara hidup lengkap dalam bernegara, bermasyarakat dan beragama.

Dr. Awang Haji Norarfani menjelaskan, perkembangan itu dapat dilihat dari pembangunan pelbagai aspek merangkumi pendidikan, perekonomian, perundangan, pentadbiran dan sebagainya.

Rektor UNISSA juga menerangkan bahawa Kerajaan Negara Brunei Darussalam

mengutamakan aspek keberkatan dalam usaha membangun masyarakat dan negara.

KAIB merupakan persidangan tahunan yang diterajui Universiti Teknologi MARA (UiTM), Sarawak dengan kerjasama UiTM, Sabah; UNISSA, Brunei Darussalam; Universitas Mulawarman, Samarinda; Universitas Lambung Mangkurat Banjarmasin; Institut Agama Islam Negeri Pontianak; dan Kolej Universiti Perguruan Islam Seri Begawan (KUPU SB), Brunei Darussalam.

Sebanyak 111 kertas kerja termasuk sembilan kertas utama dibentangkan dan turut membentang selaku pembentang utama dalam persidangan ini ialah Gabenor Kalimantan Timur dan Menteri Muda Utiliti Sarawak.

Persidangan ini mendapat sambutan daripada cendekiawan dan ulama rantau ini dalam usaha menggerakkan dakwah dan membongkar rahsia perkembangan dan tamadun Islam di Kepulauan Borneo.



REKTOR UNISSA, Dr. Awang Haji Norarfani (tengah) semasa bergambar ramai pada KAIB Ke-10.

**LENSA**

Anda kreatif, berbakat dan berminat dalam fotografi?

**Terma dan Syarat :**

- Penyertaan dibuka kepada orang ramai terdiri daripada rakyat dan penduduk Negara Brunei Darussalam kecuali warga Jabatan Penerangan.
- Gambar yang dihantar hendaklah dalam format JPEG dengan ukuran gambar 7" x 5" 300 dpi dan disertakan penerangan ringkas tidak melebihi 100 perkataan.
- Setiap gambar perlu diberi keterangan mengenai jenis kamera yang digunakan (DSLR/compact/kamera telefon), konfigurasi kamera (ISO, Aperture dan shutter speed)
- Nama penuh, nombor kad pengenalan, alamat lengkap dan nombor telefon hendaklah disertakan dan dihantar melalui :

**pelita.brunei@information.gov.bn**

- Jabatan Penerangan adalah dibenarkan untuk menggunakan gambar yang terpilih dalam mana-mana terbitan jabatan.
- Gambar terpilih akan memenangi wang sagu hati BND50.00.

1.'Saya Suka Membaca Pelita Brunei'. - Tarikh Tutup 30 September 2017  
2.'Perarakan Jubli Emas Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam Menaiki Takhta'. - Tarikh Tutup 14 Oktober 2017  
3.'Majlis Perkahwinan Melayu Brunei'. - Tarikh Tutup 4 November 2017  
TAJUK-TAJUK HENDAKLAH DIHANTAR SEBELUM JAM 12.00 TENGAH HARI